

Interes grandi pa hayazgonan di St. Cruz y Bestuurskantoor Durante "Open House" riba Dia di Betico

ORANJESTAD- Diaranson dia 25 di Januari un multitud di persona a bay rumbo playa pa asina pasa e ruta di Museo y Galeria cu tabata habri pa publico specialmente pa nos dia nacional di Betico.

E dia aki Museo Arkeologico Nacional Aruba (MANA), Museo Historico Aruba (MHA), Stichting Rancho (SR), Ateliers '89, UNOCA y Studio a uni pa trece storia, historia, arte y cultura na un manera creativo y inspirativo pa grandi y chikito disfruta.

Museo Arkeologico Nacional Aruba a habri henter e compleho di edificio pa publico drenta y admira restauracion di e edificionan historico como tambe haya un bista di e trabounan cu taser haci eyden.

E interes tabata hopi grandi pa e hayazgonan cu a ser haya na e excavacion di St. Cruz como tambe e hayazgonan di bestuurskantoor cual a hala hopi atencion di bishitantenan cu a haci uzo di e oportunidad pa papia cu e arkeologo y asistente di arkeologonan mes na e Departamento Cientifico.



Esunnan cu a bishita Museo riba e dia festivo aki tabata tin e primicia di cumpra e di dos journal científico di Museo 'Ceque 2, A Sailor's Grave at Boc'i Brik/ Puente: Lost to the 1886 Hurricane Disaster'.

E journal científico aki ta e resultado di investigacionnan haci pa e Departamento Cientifico di MANA riba e restonan di skelet haya na 2007 na Boc'i Brik den area di Puente/ Andicuri y ta un contribucion importante na historia recién di nos isla.

Durante 2012 MANA lo trece un exposicion temporario y diferente actividadnan pa publico tocante e tema interesante aki. Durante e 'Open House'



publico por a disfruta den estilo di kofflemorgen di un dushi bolo, drikidek y chuculati pin-da, mientras cu muchanan a traha 'headband' y armband, inspira pa nos antepasado como tambe e temporada di carnaval, den e 'Kidscorner' bou tentnan riba e plein

dilanti Museo.

Edy Tec a percura pa trece ambiente cu dushi musica y den 'ex-fruteria' por a mira e parti di e capitulo di e programa di antes di Instituto di Cultura unda ta mira e apertura di Museo Arkeologico na Zoutmanstraat na

aña 1981.

Henter 2012 MANA ta conmemora 30 aña di existencia di Museo Arkeologico, cual a cuminsa cu lansamento di un Time-Line riba su website www.nam-aruba.org riba dia 20 di December 2011, exactamente 30 aña despues cu a habri Museo.

MANA lo celebra su aña aniversario den forma di un programa publico varia y interesante dedica na 30 aña di proteccion, conservacion, preservacion, exhibicion di y informacion tocante nos herencia arkeologico.

Ta en special na tur boluntario y brigada hubenil di Museo cu e dia aki a bira un exito asina grandi y MANA ta gradici pa medio di e comunicado aki un y tur cu a yuda pa e dia aki bira un exito rotundo. □